

**Naib Presiden PBB Lihan Jok Dipilih Senator
Bernama
15 November , 2011**

KUCHING, Nov 15 (Bernama) -- Naib Presiden Parti Pesaka Bumiputera Bersatu (PBB) Lihan Jok pada Selasa dipilih sebagai Anggota Dewan Negara bagi menggantikan Senator Datuk Idris Buang, yang tempoh penggal keduanya tamat pada 18 Nov ini.

Lihan, 54, bekas Anggota Dewan Undangan Negeri Telang Usan selama dua penggal, dari tahun 2001 hingga 2011, dipilih menerusi undian pada persidangan Dewan Undangan Negeri Sarawak yang menyaksikan keputusan 50-15 undi.

Seorang lagi yang dicadangkan ialah Pengerusi Majlis Perundingan Dayak DAP Dr John Brian Anthony.

Timbalan Ketua Menteri Tan Sri Alfred Jabu, yang mencalonkan Lihan, berkata senator yang baru dipilih itu memberikan keizinannya untuk dipilih bagi memegang jawatan itu.

"Saya yakin beliau akan memberi sumbangan penting bagi mewakili Sarawak untuk memastikan keterangkuman penyertaan penduduk luar bandar bagi menjayakan pelaksanaan Program Transformasi Kerajaan, Program Transformasi Ekonomi dan Bidang Keberhasilan Utama Negara," kata Jabu mengenai bapa empat anak itu.

Beliau berkata Lihan, berketurunan Kayan dari Long Bedian, Ulu Sungai Apoh di Baram, merupakan seorang aktiviti sosial dan menjadi tunjang penggerak persatuan Orang Ulu bersatu di bawah FORUM, yang menyaksikan Lihan sebagai Presidennya.

---BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=627126>